

SEGUNDA CARTA DEL APOSTOL SAN PABLO A LOS CORINTIOS

Pablo ucheẽ mbesa mondo Corinto jenda je

1 ¹Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jêje aque. Jesús quiato Corinto jenda ja je. Acaya jenda ja je abe no. ²Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co. ⁴Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacuã abe chõ ñene. Mbae icuã tu mose ee. ⁵Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo riĩ ã. Cristo riqui urembia tuchi ure abe ùquĩ mose co. ⁶Ure mbae rasi raã mose, jêje chõ ñene. Ure mbae rasi raã mose nyii, jëingo sacuã Dios rese chõ ñene. Ì nda jêya bei riqui mbae rasi raã mose. Dios ureya eã mbuquiachã mose, jêya eã mbuquiachã sacuã abe chõ ñene. Eĩ nda jeñimbirãcuã tuchi mbae rasi raã mose. Sã ureico mbae rasi raã ure no. ⁷—Mbae icuã tu mose ee, ñimbirãcuã turã nda Dios riĩ, ure beite equia jenii ã. Mbae icuã tu mose jêje, Dios ra jêya eã mbuquiachã jësi. Sã seya eã mbuquiachã sesi no.

⁸Mbae rasi que uresaã tuchite ureico mose Asia ra. Ûquĩ ndese taembiirandu. Mbia que urecuayãte quia ra. Aete ureico ñimbirãcuã eã. —Mbae icuã nda hui eã mbeichĩ nandesi re, ure rei que equia ra. ⁹—Mbae icuã nda nandemingoã nyee, ure rei que equia ra. Mbae icuã tuutu bei mose ure je. Ure Dios icua sacuã ño ngue ùquĩ nde. —Nande ae eã ñene, ure i sacuã ño ñene. Sã Dios ae riqui mbia raaque mbuquera

uquirãcuã je no. ¹⁰Mbae icuã ureiquia serĩ nguia nae, ùquĩ si que Dios ae urerirõ nda. Ûquĩ si eriqui urerirõ ndirõ mbei ã. Ûquĩ si ra eriqui urerirõ mbei no. Ûquĩ ureicuate quia ã. ¹¹Jẽ abe jeñee Dios je urerĩ no. Mbia tubirã ñee mose Dios je urerĩ, Dios ra ùquĩ ñee ñandu. Dios ra uturã mondo tuchi ure je. Ûquĩ nda gracias i tuchi Dios je urerĩ cote.

Pablo oso jei eã Corinto

¹²Ure que mbia mo urembiĩrĩ irĩ ãte quia ra. Jẽ abe mbiĩrĩ iriã no. Dios resendate que ureico jẽje ra. Ureyate mbae turã naa naa mose jẽje. Nyebe urechiã iate riqui nguia. Dios ae chõ ngue uremingo mbae turã ndese huee ra. Ureaquiato ae eã ngue ra. ¹³Ae urembesa mondo quia jẽje nyii, ùquĩ jẽicuate raque quia ùquĩ. Urechimbese checuato raque. Urechimbese nda jẽicua ja tuchi rã seje chã. ¹⁴Jẽ seicua jiri raque quia ùquĩ. Jẽya tuchi rã nda urerese Jesucristo tu mose chã. Sã ureyate riqui jendese ã no.

¹⁵Sã jẽyate riqui serese co no. Ûquĩ aicuate quia se abe co. Nyebe acheẽ ndei nguia sechiangui re nyii. —Tasobe rã erea. Ñ nda eyabe jiri sesobe mose erea, ae rei que se nyii ra. ¹⁶—Seso mose Macedonia, taicha bei oso jendea, ae rei que se ra. —Obei abe nda aichabe erea chã. Ñ nda mbae mo mee seje sembu bei sacua Judea, ae rei que se no nda. ¹⁷Se ndua mose ùquĩ ndese, ¿eicuate ùquĩ nde? ¿Acheẽ ñoño ño se quia ùquĩ nde? Se eno i mose, eno ae bei chõ nda se. Secheẽ nda ambuchebiã mbei. Jesús quiatoã ae ùquĩ saã nguia. ¹⁸Sã Dios ñee ñoñoa no. Eĩ ure quia ure abe urecheẽ mbuchebiã jẽje ã. ¹⁹Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ ño ngue asenei senei nguia jẽje resẽ. Timoteo rese. Silvano abe rese no. ²⁰—Mbae turã nda asaã jẽje, i tuchi rei que Dios quia nande je nyii ra. Jesús rĩ ño eriqui nguia ùquĩ naa naa nande je ã cote. Jesús rĩ ño nandeico nguia Amén i Dios je ã cote. ²¹Dios ae chõ nandembirãcuã mingo nguia Cristo rese co. Nandemingo icúe umbaerã. ²²Dios que nandisirõ umbaerã nda. Umbae marca que emiĩ naanguia nanderese ra. Espiritu Turã ngue emondo nandechiangui re ra. Nanderereco quiato sacua umbaerã.

²³Aso eã equia jendea nae, jẽireĩ ngũiã sacua ño asoã nguia jendea aque mose. Seso sereã ae eã ngue eno nde. Acheẽ ñoño eã ño nguia jẽje co. Dios riqui sechiã icuate co. ²⁴—Jenderecuarã nda se, ae ãte quia co. —Co rese chõ jẽingo ndua, ae aroneate quia jẽje co. Taembia chõ Jesús rese. Ûquĩ miĩ ño asaã nguia jẽje. Jẽ ae chõ jeñimbirãcuã nguia Jesús icua ùquĩ.

2 ¹—Aso si eã nda ñee asi asi jẽje jembia eã, ae que se ra. ²Seso mose jembia eã, aba quia ra sembia se cote. Jẽ ño sembia quia resẽ. ³Nyebe ambesa mondo jẽje nyii resẽ. Jẽ mbae mbitirõ sacua seso nonde jendea. Seso sereãte que oso mae jẽicua ndese ra. Sembia eã sacua. Jẽ nguia nda sembia nguia ña. —Seya mose ra jẽya jẽ abe, ae que se ra. ⁴Ae ambesa mondo jẽje

nyii nae, ũquĩ mose que seya eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguiã jêje. — Pablo ndua tuchichĩ nanderese, i sacua ño ngue ambesa mondo nguiã jêje.

Ae mbae icua saã nguia nyii nae, aque jëisi turã ño cote, i Pablo

⁵Ae siqui ngu ninisi rese nyii nae, sembia eã tuchi chõ aque re. Se mii eã ngue sembia eã nda. Jemo abe abe mbia eã ngue ra. ⁶Mbae rasi que esaã tuchi huiicua ñii cote ra. Jê emombo mose nyii. Jëisi turã ño cote. ⁷Aque icua si jëtesarei chõ cote. Jêturã ño ee cote. Jembia jiri. Ñ nda eya eã embiicha eã Dios si. ⁸Jenyesequa tuchi chõ nguia erese jê. Jêturã sí chõ ee jê. ⁹—Ma secheẽ mumba eã, ae que embesa mondo jêje nyii ra. ¹⁰Jëtesarei mose aque icua si, se abe atesarei chõ nguiã esi co. Jenii ño aico nguiã tesarei esi co. Cristo resa rae chõ aico nguiã tesarei esi. ¹¹Nandetesarei mose emo icua si, Satanás siquía sacua nanderese chõ ñene. Sã Satanás ndiqui aba mbiĩrĩ irĩ mbeite no.

Sechiã ngue ngoi eã mbei Troas ra, i ñi Pablo re

¹²Secuasẽ mose Troas Cristo cheẽ nenei nenei sacua, Cristo que mbia mbuchiisaquia tuchi rei secheẽ andu ra. ¹³Tito oreãte que seje huee ra. Nyebe sechiã ngoi eã mbeite nguiã. Nyebe “co acua quia co” ae nguiã hue jenda je. Macedõniaa ngue aso cote ra.

Dios uremingo turã mbeite quia Cristo riĩ co

¹⁴Aico gracias i beite Dios je co. Ae chõ uremingo turã mbeite nguiã Cristo riĩ co. Ae chõ urembirãcuã nguiã mbae icua si co. Ae chõ ucheẽ senei senei uquia nguiã ure je mangue jenda chooñoa je co. Aba mbushimbusa rã tuchi chõ echeẽ nde. Sã aba mbushimbusa riqui mbae mbushimbu turã jate no. ¹⁵Cristo riqui urechiangui re co. Nyebe ureico nguiã aba mbushimbusa rãte Dios je ã. Ure Dios cheẽ nenei nenei mose, emo emo ño echeẽ isi nguiã. Siqui bei sacua. Emo emo ño echeẽ isiã nguiã no. Nyoĩ sacua tata cuasu. ¹⁶Ae ra nyoĩ tata cuasu nae, mbae shimbu icua naanguia chõ Dios cheẽ ndiqui nguiã ee. Ae ra siqui bei quia nae, aba mbushimbusa turã naanguia chõ Dios cheẽ ndiqui nguiã ee. ¿Aba chõ eaquiatu Dios cheẽ nenei nenei ña? ¹⁷Ae Dios cheẽ senei senei ñooño nguia nae, ũquĩ na eã ño ureico nguiã Dios cheẽ nenei nenei ure ã. —Mbae mo jembu rã ure je, ureã tuchi chõ nguiã Dios cheẽ nenei nenei mose jêje ã. Sã eataque riqui Dios cheẽ abi abi erenei nenei mose no. Eĩ eã ño ure re. Dios cheẽ uresenei turã ja chõ nguiã ure. Ureico mingue chõ nguiã erenei nenei ure ã. Dios chõ ngue ureirabo nguiã ure. Cristo quiato chõ ure re. Dios résa chõ ureico nguiã echeẽ nenei nenei ã.

Jesús cheẽ yasu nandereco quia ã cote

3 ¹¿Urecuasú uresaã saã si reĩ nguia jêje ã nde? Tei. Jenyicua ja chõ ure resẽ. ¿Emo nda ureturã senei mbesa mondo jêje re? ¿Emo

nda jêturã senei mbesa imbu ure je re no? Tei. Nandechiicua ja chõ equia ã ndesẽ. ²Aico jenderequia beite sechiangui re co. Embesa ji rese mae na ño mbia riqui nguiã mae jendese ã. ³Urechimbaaquiatu chõ jẽ ndesẽ. Cristo chimbesa rã ño jëingo nguiã. Tinta je eã ngue jembesa ra. Espiritu Turã je chõ ngue jembesa nguiã. Sita eã ngue Cristo mbesa nguiã. Jeñia ño ngue embesa nguiã.

⁴Cristo chõ ã icua nguiã seje. Dios résa chõ aico nguiã ñee jêje ã. ⁵Sequirãcuã ae je ra mbae aicuayã. Dios chõ uquirãcuã mee nguiã seje mbae icua sacuã. ⁶Dios chõ uquirãcuã mee nguiã seje, ucheẽ yasu renei nenei sacuã. —Embesa ji cheẽ jemumbayã mose ra jaemingo bei, i ãte Dios quia nande je ã. Espiritu Turã ae chõ aba mingo bei nguiã. — Embesa ji cheẽ tamumbayã mbei chõ nguia seico bei sacuã, i mose emo, aque ra siqui bei eã. Espiritu Turã ae nandemingo beisa re.

⁷Sita mbesa ji Moisés quereco quia nae, mbae nininya tuchi que eriqui aque mose ra. Mbia mae sayã tuchi que Moisés ruba riqui ra. Moisés ruba nininyate quiatu ngue eriqui nguiã ee. Enininya que uque uquete oso quia cote ra. Moisés chimbesa mbia mingo bei aroneate. —Mbia siqui icuã mose, mbia ra mano, i que Moisés chimbesa mbia mbiirandu ra. ⁸Mbae nininyate raque aque mose. Ae Jesús cheẽ yasu nandereco namo ã nae, ùquĩ nguiarei enininya tuchi Moisés chimbesa si. ⁹Moisés chimbesa quiatu que mbia mbiirandu tuchi huiicua ndese ra. Jesús cheẽ yasu quiarei nandembiirandu nandeicuã mbitirõ ndese. Jesús cheẽ yasu quiarei enininya tuchi Moisés chimbesa si. ¹⁰Moisés chimbesa quiarei enininya eã jiri Jesús cheẽ yasu si. Jesús cheẽ yasu quiarei i tuchi Moisés chimbesa si. ¹¹Moisés chimbesa que siqui bei sacuã eã nda. Jesús cheẽ yasu quia siqui bei sacuã nde. Nyebe Jesús cheẽ yasu enininya tuchi Moisés chimbesa si re.

¹²Jesús cheẽ yasu ra siqui bei. Ùquĩ nandeicuate quia ã. Nyebe ureico nguiã ñee tuchi jêje ã. Mbae mbuchecua tuchi jêje. ¹³Moisés rã eã ño ureico nguiã ure ã. Moisés que nguba chatite quia aque mose ra. —Ï nda judíos mae eã seruba nininya que rese, i. ¹⁴Judíos que Moisés chimbesa icuayãte quia ra. Namu abe eicuayãte. Emo leer i mose Moisés chimbesa je judíos je, icuayã mbeite. Ae siqui Cristo rese nae, ùquĩ mii ño Moisés chimbesa icua nguiã. ¹⁵Namu abe judíos Moisés chimbesa icuayãte quia ã. Emo leer i mose ee, echecuayã mbeite riqui ee ã. ¹⁶Emo uba mose Jesús rese, Moisés chimbesa abe ra echecuate ee cote. ¹⁷Jesús si rei Espiritu Turã. Nandeico mose Espiritu Turã ndese, ae chõ nandembui mingo nguiã Moisés chimbesa si ã. ¹⁸Nande Jesús icua mose, espejo rã ño nanderuba riqui nguiã. Jesús ruba nininya rã i i chõ nande re. Espiritu Turã abe siqui i i chõ nguiã nanderese. Nyebe nandeico i i nguiã Cristo rã ã.

4 ¹Dios turãte eriqui ure je co. —Jesús cheẽ yasu jësenei senei mbei mbia je, i Dios quia ure je co. Nyebe ureico nguiã ñimondocho ãte

echeẽ nenei nenei mbia je ã. ²Mbae icuã asaã saã nyecuayã eãte quia co. Ae aba ireĩte riqui nae, ùquĩ asaã saã eãte quia co no. Mbia ambĩĩrĩ irĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui si tuchi chõ aico nguiã erenei nenei co. Dios résaa chõ aico nguiã erenei nenei co. Secheẽ ñooñoa mbia icuate raque quia uchiangui re ùquĩ. ³Ae asenei senei mbeite quia Jesús rĩĩ nae, echecuayã eã ño ùquĩ nde. Ae ra nyoi tata cuasu nae, ùquĩ miĩ je chõ echecuayã nde. ⁴Jesús icua eãte quiatu nguiã. Nyebe aba checuayã nderecua riqui nguiã embaaracuayã Cristo cheẽ turã niĩ co. Nyebe eriqui nguiã Cristo nininya icuayãte co. Dios rã tuchi rei Cristo. ⁵Se mbia mbaaquiato quiato mose, serĩ eã ño aico nguiã ñee ee. Jesucristo rĩĩ ño ñene. Ae rei mbia rerecuarã tuchi. Jenimba rã ño aico nguiã Jesús rĩĩ se co. ⁶Dios que nyaashĩ saã nyii ra. Itondaru beire nyii. Ae sí que nandembaaquiato quiato Jesucristo rĩĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã si.

Dios ae rese aico co, i ñi Pablo re

⁷Ure ae urenininya eãte raque. Tuchu achõ na ño ureico nguiã Jesucristo nininya siquiã mose urerese. Dios ae chõ uquirãcuã mee nguiã ure je co. ⁸Mbae icuã tã i bei beite raque ure je. Urechimondocho eã mbei rae. Mbae aba mbecoteã chĩchĩte raque. Urehui eã mbei ra Jesús si. ⁹Mbia siqui icuã icuãte raque ure je. Dios quia hui ãte nguiã uresi co. Mbia ureririrõte raque. Urembui eã mbei quia nda Dios si re. ¹⁰Sã mbia icuã icuã ndiqui Jesús je cose no. Sã eiquia no. Eĩ si chõ mbia nguiã ureiquia serĩ serĩte ã no. Mbia mae sacuã Jesús quirãcuã ndese chõ ùquĩ nde. Ae quera si nae, aque quirãcuã ndese mae sacuã ño ùquĩ nde. ¹¹Ureico raque ure ã. Mbia ureiquia serĩ serĩ mbeite quia Jesús rĩĩ ã. Jesús quirãcuã siqui sacuã urerete quirãcuã nea ndese chõ ùquĩ nde. Mbia mae sacuã Jesús quirãcuã ndese chõ ùquĩ nde. ¹²Uremano serĩ serĩte equia ã. Jẽingo turã sacuã Jesús rese chõ ùquĩ nde. ¹³Sã embesa ji ñee no: “Dios icuare chõ aico nguiã ñee”, sã i no. Eĩ si chõ ure no nde. Dios icuare chõ ureico nguiã ñee. ¹⁴Sã Dios quirãcuã Jesús raaque mbuquera no. Eĩ si ra Dios nandembuquera Jesús rĩĩ nande abe. Ae ra nandemingo turã ja ujii cote. ¹⁵Seje mbae icuã icuã mose, jemingo turã sacuã ño ùquĩ nde. Ĩ nda Dios uturã mee mbia tubiriã je. Ĩ nda mbia tubiriã gracias i tuchi Dios je. Dios iate mbia ùquĩ naa mose. ¹⁶Nyebe ureico nguiã ñimondocho eã mbei. Urerete si raque quia ngoite qui cote. Urechimbiasu i i chõ nguiã urechiangui re ã. ¹⁷Ae rasi uresaã nguia ã nae, ùquĩ ndasi ra ua jei chõ. Ùquĩ ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote. ¹⁸Ae rese nandeico mae mbae nae, ùquĩ nda ua jei. Ae rese nandeico mae eãte nae, ùquĩ nguia ra ua eã mbei. Nyebe ureico nguiã ndua mbae nandemae sayã ndese.

5 ¹Sã tuchua riqui shii jeite no jê. Eĩ si chõ nanderete no nde. Mano jei. Mbia serete iquia mose, tuchua ao ji mo ñi ibate seraarõ arõ pe. Dios chisaã ño hue re. Hue tuchua ra shii eã mbei. Mbia chisaã eã ño ñene. ²Tuchua mo na ndei nanderete. Shii jei. Co serete rerequia mose, aico jiabute co. Co aico oso sete sechuchua ibatenda rea co. ³Ñda serete yasu areco bei pee ibate. ⁴Tuchua mo na ndei nanderete. Co serete rerequia mose, aico jiabute co. Seya eãte aico co. Semano sereãte raque. Serete yasu quia areco sete nguiã. Mbae yasu ja ra aque mose seje cote. Amanoa mbei ra aque mose cote. ⁵Ûquĩ je chõ ngue Dios sererecoquiato nguiã. Semingo turã mbei ra cote. Nyebe Espiritu Turã mondo nguiã seje. Sembiirandu sacua ùquĩ ndese. Dios Espiritu Turã mondo mose seje, umbae marca mii naanguia serese chõ ùquĩ nde.

⁶Nyebe aico nguiã ñimondocho eãte co. Ñ nanderete rerequia bei mose, eĩ nda nandeso aroneate rei ibate siqui Jesús rese. ⁷Aico beite Dios icua co. Amae ãte raque erese. Ae rese nandeico mae nae, ùquĩ ndese aico ãte co. ⁸Nyebe aico nguiã ñimondocho eãte co. Co serete ajea bite raque oso sacua ibate siqui bei nonde Jesús rese. ⁹Ae Dios bite nae, ùquĩ asaã sete quia ee co. Dios seisi turã nonde chõ ùquĩ nde. Aa seico mose. Pee ibate seico mose abe no. ¹⁰Cristo résa ra nandecu ja emo mose. Ae nanderea sacua. Nandeicua sacua. Ae mbae turã saã saã nguia siqui mose íbii nae, Cristo ra mbae turã mondo ùquĩ je pee cote. Ae mbae icua saã saã nguia siqui mose íbii nae, ùquĩ je ra Cristo mbae icua mondo

Dios ae nandemingo turã nguiã uchiése Jesucristo riĩ co

¹¹Aba siquichesa tuchi cho Dios re, mbia siqui eã mose erese. Nyebe ureico nguiã mbia mbuti mbuti tuchi co. Dios riqui ureicuate co. Jê abe jêingo ureicuate ùquĩ ndenoae. ¹²Ñ ureico urecuasu raã naa si ãte raque ã. Jembia sacua ño ureico nguiã ñee urerĩ sí ã. Ñ nda jeñee aquiato mbia icua ñee ndibishorõ. Ae uturã saã ñooño nguia nae, ùquĩ ñee ndibishorõ sacua ño ñene. ¹³Urearacuayã mose, Dios cheẽ ndese siqui sacua ño ñene. Urearacua mose, jembaaquiato sacua ño ùquĩ no nde. ¹⁴Sã Cristo nyesecua tuchite nanderese no. Ae chõ sembuti mbuti nguiã co no. Cristo que mano nande ja je ra. Nyebe nande abe nandemano ja nguiã erese. ¹⁵Cristo que mano nande ja je ra. Ae nandebite riqui nae, ùquĩ ndese nandeico eã sacua ño Cristo mano nguiã. Ae Cristo bite riqui nae, ùquĩ ndese nandeico sacua nguiatu ngue Cristo mano nguiã. Nande je que Cristo mano nda. Nande je que Cristo quera si no nda.

¹⁶Jesús quiatoã na eã ño ureico nguiã mae mbia rese ã. Urechesequa chõ nguiã mbia rese ã cote. Urechesequa eãte raque Cristo rese nyii. ¹⁷Emo ñimbucha mose Cristo rese, mbia yasu rã ño ùquĩ cote re. Ae esaã saã nguia mbae icua nyii nae, ùquĩ si que hui ja cote ra. Mbae yasu ja chõ ee cote re. ¹⁸Dios ae ùquĩ saã ja nguiã nande je co. Dios ae nandemingo

turã nguiã uchiese Jesucristo riĩ co. —Mbia emingo mingo bei serese sequia torã jẽ, i que Dios seje ra. ¹⁹—Sã mbia sequiatorã ja, i que Dios Cristo riĩ nda. Ũquĩ je chõ ngue Cristo mano nguiã. Mbia icuã mbutiã sacuã esi chõ ngue Cristo mano nguiã. —Mbia emingo mingo bei serese sequiatorã jẽ, i que Dios seje ra. ²⁰Cristo chõ sembucheẽ nguiã co. Secheẽ ae eã ñene. Dios ñee na jêje chõ aico nguiã ñee jêje co: Dios quiatorã ño jẽingo jẽ. ²¹Mbae icuã mo ngue Cristo saã eãte rei ra. Dios que mbae icuã naasa saã tuchi ee ra. Dios nandemingo turã mbei sacuã ño ũquĩ nde. Sã Dios nandemingo turã mbei nandeico mose Cristo rese no.

6 ¹Dios resenda chõ ureico nguiã Dios cheẽ nenei nenei ã. Dios turã jëisi chooñoa ño nguia jẽ. Jëisi tuchi quiatu jẽ. ²Eĩ ngue embesa ji huĩ Dios cheẽ nda:

“Jeñee mose seje, jeñee ngue achandu ra.

Aendirõ ngue mbae icuã si ra”, i que Dios mbi a je cose ra, i ñi embesa ji re. Namõ ño Dios riqui nguiã aba cheẽ anduse co. Namõ ño Dios riqui nguiã mbia rirõse eicuã si co no. ³Ã ureico mbia mo mbiĩrĩ irĩ eãt e ã. Ĩ nda mbia urecheẽ andu turã Jesús riĩ. ⁴Mbae uresaã turã sete quia ure ã. —Dios rimba turã ño ũquĩ nde, i nonde mbia ure riĩ. Nyebe ureico nguiã ñimbirãcuã tuchi mbia icuã mose ure je ã. Mbae tiã mose abe ure je. ⁵Ureiruã nua ngue equia ra. Uretarõ tarõ mbei que equia ra. Urerecteã mbei que eriqui ra. Ureque reã tuchi que equia ra. Ueriãcuã tuchi que eriqui no nda. ⁶Ũquĩ icuã eĩ eĩ mose ure je, ureico turãte que equia ra. Ure que Dios ureicuate quia ra. Urechimbirãcuãte que equia ra. Ureico turãte que equia mbia je no nda. Espiritu Turã ngue siqui tuchi urerese no nda. Urechesequa chooñoa ngue equia mbia rese no nda. ⁷Dios cheẽ ichoiñosa reã ngue uresenei senei tuchi quia mbia je ra. Dios quirãcuã ngue siqui tuchi quia urerese ra. Ae uturã Jesucristo mee nguia ure je nae, ũquĩ mii ño urereaquiato bei nguiã co. ⁸Emo emo mose mbia riqui ñee turã urerĩ ã. Emo emo mose mbia ñee icuã urerĩ no. —iAe bei jẽ! i tuchi que equia urecheẽ je emo emo mose no nda. ⁹Mbia riqui ureririrõ ndirõ emo mose ã. Emo emo mose eriqui ureisi turã turãte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no. ¹⁰Ureya eãte raque. Dios rese quia ureyate re. Mbaecha reã ndaque ure no. Mbaecha que uresaã uquia tuchi mbia je ra. Mbae eã tuchi raque urembae. Dios rese quia urembae tubiriã tuchi re.

¹¹Urecheẽ nyecuate que jêje ra. Urecheẽ ngue jembiiĩ iriã tuchi quia ra, Corinto jenda. Ureico nyesequa tuchi jendese a. ¹²Ure que urechao eã jësi ra. Jẽ nguiatu ngue jenyao nguiã ure si. ¹³Sã mbia mo ndiqui ñee nguiĩrĩ je no. Eĩ ae chõ nguiã ñee jêje. Jendu rã ño aico nguiã jêje. Jenyesequa tuchi chõ nguia serese. Sã aico nyesequa jendese no.

Dios chuchua tuchi chō jendete re

¹⁴Dios quiatoã ndese ra jeñimbuchachĩ jẽ. Dios quiatoã na eã ño jẽ nde. Sã mbae turã ndiqui mbae icuã mbiroã no. Sã nyaashĩ ndiqui itondaru mbiroã no. ¹⁵Sã Cristo riquiã Satanás ndese no. Eĩ si chō Cristo quiato siqui aroneate nguiã Cristo quiatoã ndese no. ¹⁶Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ũquĩ. Sã Dios ñee ã no:

Erete ye ra aico. Ererecuarã nda se.

Mbia ra siqui serui,

sã i Dios no. ¹⁷Dios cheẽ ño ã no nde:

Jẽhui chō mbae icuã si. Icuẽ jẽingo.

Mbae icuã ndese ra jẽocochĩ.

Jaëisi turã nda se chã.

¹⁸Jendurã nda se chã.

Seriirina nda jẽ ña.

Sequirãcuãte se,

i que Dios cheẽ mbesa ji ra.

7 ¹Dios cheẽ ño ã nde. —Aico bei ra jendese, i que ra. Nyebe nandehui mbae icuã si ñimbitirō mbei. Cochee chō nandeico Dios je. Nandereco nandemee tuchi ee.

Seyate aico jendese co cote, i ñi Pablo re

²Ureisi turã ño jẽ. Mbae icuã mo ngue uresaã ãte jemo je ra jẽ. Ureico que equia jembirĩ irĩ ãte ra jẽ. ³Jẽicuã i sacuã eã ño aico nguiã ñee jẽje. Achesequa tuchite quia jendese co. Semano mose chee. Sã ñi acheẽ jẽje nyii no. ⁴Seyate aico jendese co. Secheẽ nda emumbayã, aete se quia jeni co. Mbia icuã icuã mose seje, seyate aico jendese co.

⁵Urechu que aa Macedóniaa, aque mose bei que urerecoteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi ãte rei quia ra. ⁶Dios que sechiã mbocoi Tito ngasẽ mose cote ra. Sã Dios riqui uquiato mbia beite eya eã mose no. ⁷Tito mii ndese eã ño seya re. Seya tuchi que sembiirandu mose jendese no nda. Jẽ nane ngue jeñee Tito mbirãcuã nda. Aquere que Tito ru sembirãcuã cote ra. —Hue echi ndua tuchite nderese huee, i que u ñee seje ra. Nyebe seya tuchite riqui nguiã jendese. Jẽtesarei eãte quia equia sesi reaẽ. ⁸Ae ambesa mondo jẽje nyii nae, ũquĩ ngue jembia eãte rei ra. Erea ramo mose. —Amondo jirichĩ nguiã, ae rei que se quia nyii ra. —Amondo jirichĩ nguiã, ae ãte se quia co cote. ⁹Seyate aico jendese co cote. Jẽya eã nii eã ño ñene. Jeñimbitirō nguiatu ngue re. Maende sechimbesa rese. Sechimbesa jembia eã mose jẽicuã ndese, Dios rese que jendua cote ra. Sechimbesa chō jemingo turã nguiã cote. ¹⁰Emo ia

eã ñooño mose huiicuã ndese, ũquĩ nda nyoi tata cuasu. Emo ia eã tuchi mose huiicuã ndese, hui ra huiicuã si cote. Dios ra emingo bei cote. — Ahui jirichĩ nguia seicuã si, iã tuchi rae. ¹¹Sechimbesa oso mose jêje, jêya eã tuchi que jêicuã ndese ra. Nyebe Dios ia tuchi riqui nguiã jendese. Jendua tuchi que ra. —Mbae icuã ngue uresaã eãte resẽ, jenyẽ eãte que ra. Mbae icuã ndese que jemae sereã tuchi cote ra. Jêireĩ ireĩte que equia mbae icuã si ra. Jemae sete que equia serese ra. Ae siqui ngu ninisi rese nae, aque que jemombo cote ra. Mbae que jêsaã turã jate ra. Eicuãte i aroneate que emo nguia jêje ra. ¹²Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jê ja je chõ ngue ambesa mondo nguiã. —Pablo riqui nyesequa tuchichĩ nanderese, i ja nonde chõ ngue ambesa mondo nguiã. ¹³Nyebe ureya tuchi riqui nguiã jendese co cote. Jê ngue Tito abe jembia cote ra. Jê hui mose mbae icuã si. Seirandu mose ũquĩ ndese que seya tuchi se abe cote ra. ¹⁴Sã ñi aico jêturã nenei nenei Tito je nyii no. Eĩ jenyẽ si tuchi equia siqui turãte ũquĩ. Nyebe seireĩ nguiãte riqui nguiã ñee jeniĩ ũquĩ. Acheẽ ñooñoa ngue jêturã nii Tito je ra. Sã aico ñee ñooñoa emo mose jêje no. ¹⁵Tito riqui nyesequa i ãte jendese co. Ndua beite equia jendese co. Echeẽ nguiatu que jemumbayã tuchi quia ra. Cocheete quiatu que jêingo ee ra. Jêisi turãte quiatu que equia ra. ¹⁶—Ũquĩ nda siqui tuchi Dios rese, ae tuchi se quia jeniĩ co. Co seyate aico jendese co.

Jembae jemee jiri quia Dios je

8 ¹Jesús quiato Macedonia jenda tasenei jêje cote, Seresenda. Hue jenda ja iglesias. Dios turã tuchi que eriqui ũquĩ ja je ra. ²Mbia icuãte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guia Jesús quiato je ra. Mbaecha rã tuchi mbae mondo mbia je. ³Umbae que emee tuchi ra. Embae tubiriã eã ndaque. Abei tuchi quiatu ngue re. Amae ngue erese ra. ⁴—Ure abe ra urembae uremee tuchi Jesús quiato je, i tuchi que seje ra. ⁵Mbaechõ eã ngue emee Dios je ra. Nguete rane ngue emee ee ra. Ure je abe que ngueco mee nda. Mbae turã naa naa mbei sacuã ure je Dios riĩ. Aquere que umbae mee tuchi Jesús quiato je cote ra. ⁶Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacuã. Sã Tito ñee nyii no. —Tamunua nua ja, sã i no. ⁷Sã jêingo Dios icua tuchi no. Sã jêingo Dios cheẽ icua jate no. Sã jêaquiatute mbia mbaaquiato no. Sã jêingo sete riqui Dios cheẽ ndese no. Sã jêingo nyesequate serese no. Nyebe jembae jemee tuchi quiatu ofrendarã cote.

⁸—Secheẽ nguire quiatu jembae jemondo Dios je, ae ãte se quia co. Jê ae chõ jendua mbae mee nonde. Jesús rese jenyesequa tuchi mose, jembae ra jemee mee Jesús quiato je. Sã Macedonia jenda umbae mee

mee Jesús quiato je no. ⁹Nandererecua tuchi chõ Jesucristo re. Jesucristo turã jëicuate quia ùquĩ. Mbaecha tuchi rei que ae ereco mose ibate ra. Mbaecha reã ngue esaã tuchi u íbii nande je ra. Eriĩ ño Dios riqui nguiã mbae mondo tuchi nande je. Ae mbaecha reã naa mose u íbii. ¹⁰Tacheẽ tuchi rã jêje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jê nane ngue “ofrenda nandemondo” jenye Macedonia jenda si ra. Cosete que jeñee ñee. Jemondo turã cote. ¹¹Ae ra jemondo nae, ùquĩ ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae mii mose, co mii jemondo ee. ¹²Nande mbae mo meese mose, Diobi tuchi chõ ùquĩ nde. —Mbae tubiriã embu seje, iã nda Dios mbaecha reã je. ¹³—Jembae jemondo ja tuchi mbaecha reã je, ae ãte quia jêje co. ¹⁴Sã jembae nyiabiã jiri mbaecha reã mbae rese. Sã jembae tubiriã namo no. Emee sacua ùquĩ je. Emo mose ra ùquĩ mbae tubiriãte no. Emondo sacua jêje jembae eã mose no. Ùquĩ mose ra jembae nyiabiã jiri ja cote. ¹⁵Sã embesa ji riqui ñee no:

Ae mbae tubiriãte nae, embae rire eãte que ra.

Ae embae miite nae, embae que ua eãte ra,
i que embesa ji ra.

Tito ra nyoi jendea, i Pablo

¹⁶Sã aico ndua tuchi jendese co no. Eĩ si tuchi Dios quia Tito mundua jendese co. Nyebe aico nguiã gracias ite Dios je co. ¹⁷Tito si quia jendea aque. Secheẽ nguire achõ eã esi nguiã jendea aque. Ae abe que ndua jendese ra. ¹⁸Tito rese Jesús quiato mo amondo quia jendea aque. Jesús quiato ñee turã jate quia aque riĩ aque. Jesús cheẽ nguiatu esenei senei mbeite nguiã aque. ¹⁹Jesús quiato que aque irabo ra. Oso sacua serese. Ofrenda munua nua sacua serese. Sã ureico ofrenda munua nua Dios mbia sacua no. Mbia “abei” i sacua jêje. ²⁰Ae que siqui beite urerese ofrenda isi isi mose ra. Mbia ñee icua eã sacua ure riĩ. “Ofrenda que embuquiachã nda”, i eã sacua mbia ureriĩ. ²¹Mbae uresaã turãse rete quia ã. Dios ia tuchi sacua ure rese. Mbia abe ñee icua eã sacua ure riĩ. ²²Uresenda mo abe uremondo quia ùquĩ ndese aque. Ae quiarei mbae raã naase bei Dios je. Oso sete equia jendea co. ²³Tito rei seresenda tuchi. Siqui bei que equia serese Dios cheẽ nenei nenei mose ra. Ae nyoi quia jendea Tito rese nae, iglesias chõ emondo nguiã jendea ùquĩ. Cristo quiato tuchi chõ ùquĩ nde. ²⁴Ùquĩ jëisi turã ja chõ jê. Sã urecheẽ ee jeniĩ nyii no. —Jëisi turã ndae. Nyesecua tuchi ra jendese, ure que ee nyii ra. Nyebe jëisi turã ño. Eĩ nda iglesias jenda ja abe “eturã” i jeniĩ.

Jembae ofrenda jemunua ja rã emondo sacua mbaecha reã je

9 ¹Aete aico embesa eã jêje ofrenda riĩ. —Ae ae chõ nda mbae mo mondo nguiã Jesús quiato je, se ñee mose rocoĩ ee, ae que se ra. ²Jê

ae chõ mbae jemondose nguiã Jesús quiato mbaecha reã je ùquĩ. Jenii ño aico nguiã ñee Macedonia jenda je co. —Tenda nongue mosenda bei chõ Acaya jenda riqui nguiã mbae mondose Jesús quiato je ùquĩ, ae se quia Macedonia jenda je jeni co. Nyebe ùquĩ abe riqui nguiã mbae mee sete ee cote. Jirandure jendese. ³Aque mbia amondo quia jendea aque. Jẽ icoquiatsu sacua. Mbae jemondo sacua Jesús quiato mbaecha reã je. Ureireite ra jẽ ofrenda mundo eã mose se ñeende jeni nyii. ⁴Seso mose jendea, Macedonia jenda mo abe ra nyo serese reae. Jẽ ofrenda munua eã mbei mose, ureireite ra urecuasẽ mose hue. ⁵Nyebe ã nane amondo nguiã jendea aque. Jembae ofrenda munua ja sacua. Ae riĩ jeñee ndei tenda nongue mose. —Ofrenda jemunua na, ae bei sereãte se. Jẽ ae chõ ofrenda jemunua nua, jenyeseua mose mbia rese.

⁶Jendua rã ã ndese: Ae mbae mii jiri chitiquia quia, aque ra mbae a ucua mii jiri. Ae mbae chitiquia tuchi quia, aque quia ra mbae a ucua tuchi. ⁷Mbae ata nandemondose mose nandechiangui re, mbae ata nandemondo chõ. Mbae mii nandemondose mose nandechiangui re, mbae mii nandemondo chõ. —Mbae amondo jirichĩ, nande mose nandechiangui re, eicuãte ùquĩ. Ae eyate riqui umbae mee mose emo je nae, Dios bite ùquĩ. ⁸Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacua nandesĩ. Mbae nandemondo mundo bei sacua Dios quiato mbaecha reã je. ⁹Sã embesa ji riqui ñee no:

Mbae que Dios quiato mundo mundo bei quia mbaecha reã je ra.

Echisaã turã si ra mbia tesareĩ eã mbei,

i que embesa ji ra. ¹⁰Dios chõ mbae eĩ mundo nguiã nande je etiquia sacua. Dios chõ mbae mundo nguiã nandechiurã no. Dios chõ “iabei chõ jẽ jẽ!” i nguiã nande je. Dios chõ mbae mee nguiã nande je emondo sacua mbia mo je. ¹¹Dios ra mbae mundo tuchi jẽje. Eĩ nda jẽ mbae jemondo tuchi ofrendarã. Se jeñimee ofrenda mundo mose mbaecha reã je, gracias i tuchi ra Dios je cote. ¹²Nande mbae mo mundo mose Jesús quiato mbaecha reã je, quiaru turã jiri ra equia cote. Ùquiño eã nda esaã nguiã. Gracias i abe ra Dios je. ¹³Jẽ mbae mo mee mose Jesús quiato mbaecha reã je, mbaecha reã nda ñee turã Dios je jeni cote. —Cristo cheẽ emumbayã tuchi quia ã, i ra jeni cote. —Eriqui mbae mee tuchichĩ mbia ja je, i ra ñee turã jeni cote. ¹⁴Mbaecha reã nda ñee tuchi jeni Dios je cote. Dios jendeaquiatsu sacua. Mbaecha reã nda ndua tuchite jendese cote. Jẽ mbae mondore ee nyii. ¹⁵Dios quiatu que mbae turã tuchi mundo nande je ra. Nyebe nandeico nguiã gracias i ee.

Mbia mbaaquiatsu sacua ño Dios semii nguiã

10 ¹Se rei Pablo. Tacheẽ nyecua jẽje. Nandeico mingue chõ nguia Cristo rã si jẽ. Cochee chõ nandeico Cristo rã si jẽ. —Cochee chõ

Pablo riqui nguiã siqui mose nanderese. Siqui eã mose nanderese, ucuasu esaã saã ño nguiã aque, jenyẽ chõchĩ equia serĩ ùquĩ. ²Mbae jësaã turã turã ja chõ nguia. Ì nda acheẽ asi asiã jêje seso mose jendea. Emo emo ñee icuã ño nguiã serĩ. —Dios je eã ño Pablo riqui nguiã mbae raã naa, i serĩ. Ûquĩ je quiatu acheẽ asi asi arõte nguiã. ³Mbia chõ ndaque se. Mbia quirãcuã je eã ño aico nguiã mbae raã naa co. Dios quirãcuã je chõ aico nguiã mbae raã co. ⁴Sequirãcuã je eã ño aico nguiã mbae raã. Dios quirãcuã je chõ ñene. Nyebe aico nguiã mbia icuã ndiquisã quisã co. Mbia icuã quirã cuãteraque. ⁵Ae mbia mundua icuã icuã nguia Dios riĩ nae, ùquĩ asiquisã quisã ño nguiã co. Mbia amundua turã ja quia Cristo riĩ co. Cristo cheẽ mumbayã sacua cote. ⁶Jẽ nane Dios cheẽ jemumbayã na jẽ. Aquere ra Dios cheẽ mumbasa amombo ja cote.

⁷Mbia chiangui renda rese jemae ãte. Earonda rese chõ jëingo nguiã mae. —Cristo mbae chõ se re, i mose emo, ae miĩ eã ño Cristo mbae re. Se abe chõ ñene. ⁸Se ecuasú raã naa mose, seireĩ ngũiate. Dios quiatu ngue semii nguiã ererecuarã. Jembaaquiato turã sacua ño ngue Dios semii nguiã ererecuarã. Jembiicuã sacua eã ño ñene. ⁹Jaembusiquiche sereãte sechimbasa je. ¹⁰Mbia ñee icuãte raque seje. —Pablo reco mose isho, ñee asi asite equia ucheẽ mbesa mbesa mondo nande je co, i jemo nguia serĩ ùquĩ. —Siqui mose nanderese, ererecua raã naa aquiatoate cote, i jemo nguia serĩ ùquĩ. ¹¹Ae ñee nguia ùquĩ nae, ùquĩ je tacheẽ. Co secheẽ asi asi ambesa mondo quia jêje aque nae, anyae sí ra ñee asi asite seso mose jendea huee. Secheẽ mbesa ji ra achabiã seso mose jendea huee. ¹²Ae ñee mbeite quia uturã niĩ, ùquĩ na eã ño se re. —Aque rã si chõ aico nguiã se co, i beite equia ùquĩ. —Seturãte aico aque si co, i beite equia ùquĩ no. Ûquĩ ñee mose ùquĩ, earacuayãte riqui ùquĩ.

¹³Seturã nda asaã saã eã. Dios ae chõ “hue eso, pe eso”, i nguiã seje co. Ae chõ ngue semondo nguiã jendea. ¹⁴Se rane ngue Dios semondo jêje Cristo cheẽ nenei nenei sacua nda. Nyebe hue jenda ja sembaerã, se embaaquiato sacua Dios cheẽ ndese. Ae Dios riqui “hue eso” i ãte seje nae, huee ra asoã. ¹⁵—Sechimbaaquiato chõ ùquĩ nde, ae aronea tuchite quia emo ñimbbaaquiato je co. Jẽ Cristo icua i i tuchi mose, jendobeinda quia ra ambaaquiato i i tuchi oso cote reae. ¹⁶Seso sete jendobei Cristo cheẽ nenei nenei hue jenda je. Sechimbbaaquiato ae aroneate emo ñimbbaaquiato je. ¹⁷Emo ñee turãse mose mbae mo niĩ, sã Dios riĩ nguiatu ñee turã. ¹⁸Ae uturã saã saã nguia nae, Dios biãte ùquĩ. Ae riĩ nguiatu Dios riqui ñee turãte nae, ùquĩ nguiatu Diobi tuchi re.

Mbia mbaaquiato icuã icuãsa rese ra jëingochĩ

11 ¹Jeñimbirãcuã jiri se ñee mose jêje jẽ. Seturã tasaã saã jiri ñee jêje. ²Aqueteãte jendese jẽ. Dios mbaerã jẽ, ae que se ra jẽ. Sã acuanĩ mo ndiqui siqui eã mbei ngu mo ndese no. Sã mbia emee

acuanindu mo je cote no. Eĩ tae si chõ jemee Cristo je. Cristo mii mbaerã nda jẽ cote chã. ³Sã mbei Eva mbiirĩ irĩ cose no. Eĩ jenyje si arõte jẽ ndeae. Eĩ si arõ mbia jembiicha Cristo icha si. Jemundua icuãte chõ nda reae. Cristo mii ndese chõ jẽingo jẽ. Sã acuanu ndiqui ngu mii ndese no. ⁴¿Mbaerã jenyiisaquia turã mbia jembaaquiату icuã icuã mose re? Mbía Jesús abareã nenei nenei mose jẽje re. Mbía Espiritu Turã abareã abe renei nenei mose jẽje re. Mbía Jesús cheẽ turã abareã nenei nenei mose jẽje re no. Se que ũquĩ asenei senei ãte quia jẽje resẽ. ⁵Ũquĩ ñee ndese que jenyiisaquia, ¿mbaerã nda jenyiisaquia eã secheẽ abe rese re? Se quia Jesús cheẽ aicua tuchi quia ũquĩ si co resẽ. ⁶Secheẽ turã eãt e raque. Seaquiatute quia aico nguiã Dios cheẽ ndese co. Jẽingo seicuate ũquĩ ndesẽ.

⁷—Mbae jemondo seje, ae ãte que se quia Dios cheẽ nenei nenei mose jẽje ra. ¿Eicuãte ũquĩ nde? Aico mingüete que se quia jẽje ra. Jẽingo turã sacua Cristo rese. ¿Eicuãte ũquĩ nde no? ⁸Seico mose jendese jembaaquiату quiату mose, mbae mo ngue jemee ãte quia seje ra. Jesús quiato ishonda quiату que mbae mo mee mee nguia seje ra, se siqui mose jendese. ⁹Seico mose jendese que mbae jemondo eãte seje resẽ. Sembae eã mose que “mbae embu seje” ae ãte jẽje resẽ. Jesús quiato que ngãe Macedonia si nae, ũquĩ nguiату que mbae mee tuchi sembae eã mose resẽ. “Mbae embu seje” ae eã mbei ra jẽje. ¹⁰Cristo riqui sechiangui re co. ũquĩ aicuate. Sebite “mbae embu seje” iã mose se jẽje. “Acaya jenda que mbae mee tuchi ndeje ra”, i aroneate emo seje jeniĩ. ¹¹¿Mbaerã ño mbae aisiã jẽsi chã? Achesequa eãte quia jendese reae. Tei. ũquĩ eã ñene. Achesequate rei jendese resẽ.

¹²Mbía ñee eã sacua nda mbae aisiã mbei jẽsi resẽ. Ae Jesús abareã senei senei nguia nae, ũquĩ ñee eã sacua. “Pablo rã sí chõ ure re” ũquĩ i eã sacua. ¹³Cristo cheẽ nenei neneisa turã eã ño ũquĩ nde. Mbía mbiirĩ irĩsa chõ ũquĩ nde. Cristo cheẽ nenei neneisa raã ñooño ño nguiã ũquĩ. ¹⁴Satanás na sí chõ ũquĩ ndiqui nguiã ũquĩ. Satanás uturã saã saã ño nguiã. Angel turã naa naa ño nguiã no. ¹⁵Ae siqui Satanás ndui nae, ũquĩ nda uturã saã ñooño Satanás na sí. Nyebe ra Dios ũquĩ mbutiã tuchi emo mose.

Pablo mbae rasi saã tuchi

¹⁶“Earacuayã” jenyechĩ nda seje jẽ. “Earacuayã” jenyje raque seje, seandu rã se. Secuasú tasaã saã mbiirĩ na jẽje. ¹⁷Ae aico ñee jẽje namo nae, Dios cheẽ eã ño ũquĩ nde. Earacuayã na ño aico nguiã ñee jẽje. Secuasú asaã saã ño nguiã ñee jẽje co. ¹⁸Sã mbía riqui ucuasu raã naa jate no. Eĩ tae rã se abe secuasú raã naa jẽje. ¹⁹Jëaquiatute reĩ jẽ ndeae. Jẽingo ñimbiirãcuãte eaquiатуã je ũquĩ. Seaquiатуã je abe jeñimbiirãcuã ño. ²⁰Ae icuã icuã mbeite riqui jẽje nae, ũquĩ je jẽingo ñimbiirãcuã mbeite

ũquĩ. Jembuquiei quiei chooño mose. Jembae mbutiã chooño mose abe no. Ucuasu raã naa mose abe no. Ucu mose jēsiba rese abe no. Ũquĩ je jēingo ñimbirācuāte ũquĩ. ²¹Se quiatu que ũquĩ asaã saã eāte quia jēje ra. Aico mingue chōchĩ jēje. Acheẽ asi asi eã ñochĩ jēje. Emo ucuasu raã naa mose, se quia secuasú asaã saã mbite nguiã esi. Earacuayã na ño aico nguiã ñee se co. ²²¿Hebreos ũquĩ nde? Se abe chō ñene. ¿Israelitas ũquĩ nde? Se abe chō ñene. ¿Abraham nducucha riirĩ ũquĩ nde? Se abe chō eno nde. ²³¿Cristo rimba chō ũquĩ nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheẽ nenei nenei mose esi re. Se quia mbia seiruã nua tuchi nguiã esi. Se quiatu ngue mbia sematã matã tuchi nguiã esi. Se quiatu ngue mbia sequia serĩ serĩ tuchi nguiã. ²⁴Judíos que seiruã nua mbei quia ra. Treinta y nueve azotes bei que eriqui seiruã nua nda. Emo mose treinta y nueve no. Emo mose eĩ sí no. Cinco veces chee. ²⁵Ira que euru uru serese tres veces ra. Emo mose que sei sei sita je ra. Tres veces que barco ñĩimi ama ndiite re seje ra. Emo mose que aitō ama ndiite re barco eã nda. Abebi chō ngue sequia ra. Nyaashĩ miĩ abe que amumba quia mbebi ra. Barco ñĩimi mose seje. ²⁶Acuata tuchi que sequia ra. Mbae icuã ngue sequia arō arō tuchi quia ra. Secuata mose ama ndui. Seico mose abe sucha cuasu no. Seico mose turuquia rĩ no. Mbia mbae mbuquiachãsa que sequia arō arō tuchi quia no nda. Seresenda abe que sequia arō tuchi no nda. Judíos eã abe que sequia arōte no nda. Jesús quiato chooño abe que sequia arōte no nda. ²⁷Serisirō ngue nyichuarō arō tuchi quia ra. Aqueã mocoĩ mocoĩ tuchi que se quia no nda. Seriacuã mocoĩ mocoĩ tuchi que eriqui ra. Seisei abe tuchi que eriqui ra. Nyiiseĩ ngue airara mocoĩ mocoĩ tuchi quia ra. Seirao eã tuchi que eriqui no nda. ²⁸Ũquĩ miĩ eã ngue ra. Jesús quiato rese abe que aico ndua ndua ra. Sã iglesia jenda ja ja siqui tuchi Jesús rese, ae beite sequia ndua co. ²⁹Jesús quiato mo mbae rasi raã mose, se abe seya eã ndasite riqui erese co. Emo icuã icuã mose Jesús quiato mo je, se abe paama i rasite aico co.

³⁰Sequiracuã ndese eã nda seya riqui nguiã. Sequiracuã nea ndese chō nda seya riqui nguiã. ³¹Acheẽ ñooño eāte quia co. Dios quia secheẽ icuate nguiã. Jesucristo ru chō Dios re. Sã mbia riqui ñee turã mbei eriĩ. ³²Aretas resenda que serequia rei Damáscóo ra. Sequia sacuã. Ae que alcalde ra. Ae que mbia mondo rei eiquesa raarō nda. Setarō nda eña nde. ³³Hue rĩ ngue asoã mbei ra. Mbia que sembuquichi imbu irairu ye ra. Ventana ni. Eĩ ae que oso chee mbia icuã si ra.

Pablo ibatenda tea cuu

12 ¹Secuasú asaã saã ñochĩ nguiã co. Ae rese Dios semumae mae mbeite cuu nae, ũquĩ nguiatu tasenei jēje. ²⁻³Cosete que Dios sererao ibate cuu ra. Hace catorce años. Serete resebe Dios sererao reae.

Seaĩ achõ ere no ae. Aicuayãte se. Dios ae eicua nguiã. ⁴Dios que sererao ibate ra. Huee que ibatenda cheẽ turã ahandu ra. —Ae erechandu nae, ùquĩ nda ereseneichĩ mbia je, i que Dios seje ra. ⁵Ibatenda cheẽ andure secuasu asaã saã arondete raque se. Sequirãcuã je ra secuasu asaã saã eã. Sequirãcuã nea ndese chõ seya riqui nguiã. Sequirãcuã nea mose quia Dios uquirãcuã mee tuchi nguiã seje cote. ⁶Secuasu ra asaã saã ndaque, asaã ñooño eã ño se re. Dios quia que uquirãcuã mee seje ra. Mbae ja raã sacuã. Secuasu ra asaã saã eãte jêje. Jê ae chõ nda jemae nguiã serese seicua nonde. Jê ae chõ nda secheẽ jeñandu nguiã seicua no. ⁷Ae rese Dios semumae cuu nae, ùquĩ eturã tuchite seje. Ùquĩ ndese maende que aico secuasu raã naa arõte raque ra. Nyebe Dios nyu raanguia mondo nguiã sequi rĩ. Satanás sembecoteã sacuã. Dios semingo tochi sacuã. ⁸—Nyu raanguia esiqui sesi, ae tuchi rei que Cristo je tres veces ra. ⁹Cristo que ñee seje ra. —Coche rei ñene. Sã ñiño ndei. Seturã nguiatu amondo mbeite nguiã ndeje co. Ndequirãcuã nea mose quiatu sequirãcuã amee tuchi nguiã ndeje, i que Cristo seje ra. Nyebe seyate riqui nguiã sequirãcuã nea ndese co cote. Ùquĩ mose quia Cristo riqui nguiã uquirãcuã mee tuchi seje co. ¹⁰Nyebe seyate riqui nguiã sequirãcuã nea mose. Mbia ñee icuã mose abe. Mbia icuã icuã mose seje abe. Mbae eã mose seje abe no. Se mbae icuã irara mose Cristo rĩ abe no. Ùquĩ ja mose seyate riqui co. Cristo quiatu uquirãcuã mee tuchite nguiã seje, sequirãcuã nea mose.

Jeñia jembitirõ se oso nonde jendea, i Pablo

¹¹Sebiãte raque se sí ñee turã mose seriĩ. Jê nguiatu jeñee turã mbite raque seriĩ, mbia ñee icuã mose seje. Ae rui jêingo nae, ùquĩ equiatu ãte riqui sesi ùquĩ. Seaquiatu eã ndaque se abe. Ae rui jêingo nae, Jesús cheẽ mbuchecuasa chooño ño ùquĩ nde. ¹²Dios cheẽ mbuchecuasa tuchi chõ se re. Seico mose jendese. Aico minguete que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra. ¹³Aico turãte que sequia jêje ra. Sã aico turãte iglesias ataque jenda je no. Eĩ si. Jê mii je chõ ngue “mbae jembu seje” ae eã nguiã. ¿Ùquĩ eicuãte jêje re? “Mbae jembu seje”, iã mose jêje.

¹⁴Aico icoquiatu oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jêje. Mbae achosei chiãte jembae. Jesús rese jêingo mose, ùquĩ mii ño achosei nguiã. Jendu rã ño aico nguiã jêje. Sã mbia riiĩ ndiqui mbae mo mondo mondo eã ngu je no. Sã eru chõ ndiqui mbae mondo mondo nguiĩrĩ je no. ¹⁵Sembae amondo ja bite raque jêingo sacuã Cristo rui. Sereco abe amondo bite raque jêingo sacuã Cristo rui. Sechesequa tuchi mose jendese, ¿mbarã jêingo nyesequa eãte serese jê nde? ¹⁶“Mbae jembu seje”, ae ãte que sequia jêje. Ùquĩ jêicuate raque. ¿Mbaerã nguia jêingo ñee ñooño nde? “Pablo

que nandembiiĩ irĩ nda”, ¿mbaerã jenyere? ¹⁷ ¿Mbaerã jeñee ũquĩ nde? Ae amondo jėje jembaaquiatu sacuaã nae, ũquĩ abe que jembiiĩ irĩ eãte resẽ. Ũquĩ ngue jembae isiãte sembaerã ndesẽ. ¹⁸ Tito que amondo jendea nanderesenda rese resẽ. Ae abe que jembae isiãte resẽ. Se rã si chõ ngue eriqui jėje resẽ.

¹⁹ Achiquisã eãte sequia jęsi co resẽ. Dios rėsaa chõ aico nguiã ñee jėje. Cristo riĩ ño aico nguiã ñee jėje. Se mbae mo naa mose jėje, jęingo tuchi sacuaã Cristo rese chõ ñene. ²⁰ Seso mose jendea, sembia eã arõte. Ae sebite se, ũquĩ jęsaã eã arõte seje. Ae jembite nae, ũquĩ asaã eã arõte se abe jėje. Jeñee icuaã icuaã nda jenyue serėsaa reae. Jęingo icuaã icuaã ja ra jenyue reae. Jenongue mbae ra jenyosei chosei ję sí chõ ndeae. Jenguasu ra jęsaã ñooño sėsaa reae. ²¹ Seso mose jendea ra Dios sembia eã tuchi se mae mose jęicuã ndese reae. Seireĩte ra jęicuã ndese mae mose. Jęicuã cose ndare si jęhui eã mbei chõchĩ namo nyee. Ae jeninisiã nae, ũquĩ ndese jęingo bei chõchĩ ũquĩ. Ae jendu eã nae, ũquĩ ndese abe jęingo bei chõchĩ ũquĩ no. Mbae aba ireingua rese jęingo bei chõchĩ ũquĩ.

Hui bei Pablo saludar i mbia je

13 ¹ Aso quia jendea aque cote. Co rei tres veces co cote. Emo miĩ sembiirandu mose mbae icuaã ndese, achanduchõ nda se. Emo nyeremo ñee mose, aque mose quiatu ra echeẽ achandu cote. ² Ae eicuã saã saã nguia nyii nae, sã aico ñee asi asite ee nyii no. Ũquĩ sf je chõ aico nguiã ã mbesa ã. Huiicuã ndecha eã mose ra achimbirãcuã eã ee cote. Ję ja je chõ aico nguiã ñee ũquĩ. Seico mose raanguia jendese. ³ —¿Ma Cristo quirãcuã ndiqui Pablo rese ma nde? jenye equia nyii nae. Cristo quirãcuã ndese ra jemae secheẽ asi mose quiatu jėje cote. Cristo que mbae saã ja tuchi jėje uquirãcuã je ra. ⁴ Cristo mbia mbucha quia ira rese iquia nyii nae, aque mose que equirãcuã neate rei ra. Dios quirãcuã nguia emingo bei nguiã co cote. Sã Cristo quirãcuã nea ndei nyii no. Eĩ ño urequirãcuã nea ure namo nde. Ureico rei nguiã erese co. Ae chõ uremingo nguiã Dios quirãcuã je co. Ae quirãcuã je ra ureico jembaaquiatu quiatu.

⁵ Ję ae chõ jendua. —¿Cristo aicua quia sechiangui re re? jenye ja ja chõ jeñiangui re. Jemae nguia jenyiese sí. Ję Cristo icua chooñoa mose, Cristo riqui jeñiangui re ũquĩ. ¿Ũquĩ ndese jęingo iranuate re? ⁶ Ure quia Cristo ureicua chooñoa nguiã ã. Ũquĩ ndese nda jęirandu rã seje chã. ⁷ Urecheẽ tuchi quia Dios je jeniã ã. Ję mbae icuaã naa eã sacuaã. Mbia ndua turã sacuaã eã ure riĩ ño ureico nguiã ñee Dios je jeniã ã. Ję mbae icuaã naa eã sacuaã ño ñene. Mbia ra ñee icuaã ndaque ure je. ⁸ Mbae icuaã mo nandesã aroneate Dios cheẽ ndobeishĩ. Mbae turã nguiatu nandesã Dios cheẽ mose. Dios cheẽ nguia ichõiño eã nde. ⁹ Coche mbia riqui nguiã ñee icuaã icuaã ure je. Ję nguia jęingo bei Cristo quirãcuã ndese.

Jẽ nda Cristo jẽicua tuchi rã seje chã. ¹⁰Secheẽ asi asi ambesa quia seso nonde jendea a. Se ñee asi eã sacua seico mose jendese. Dios quiatu ngue uquirãcuã mee nguiã seje. Jembiicuã sacua eã ño ngue Dios uquirãcuã mee nguiã seje. Jemingo tuchi sacua Cristo rese chõ ñene.

¹¹Aico hui secheẽ mbesa mbesa si a cote, Seresenda. Jesucristo jẽicua tuchi quia. Jẽya bei tuchi jẽingo erese. Jẽingo turã mbei chõ nguia jenyiese. Ñquĩ mose ra Dios siqui tuchi jendese. Ae ra jemingo turã mbei jenyiese. ¹²Saludar jenyie turã mbei quiatu quia jenyue. ¹³Jesús quiato a jenda saludos mondo quia jẽje aque. ¹⁴Sã Jesucristo turã ndiqui bei jendese. Sã Dios riqui nyesequa tuchi jendese. Sã Espiritu Turã ndiqui bei jendese no. Amén.